

Nimis 17/10/1988

Cjâr pre Antoni,

'o ãi savût che tu âs chê di publicâ sul to gjornâl
il document ch'o ãi firmât "Puedije nassî une gnove zornade pe glesie?"
Poben, jessint ch'o mi soi impegnât cul Vescul a no fâlu cognossi
prin di sintî ce ch'al pense lui su chest document, 'o sei contra
ri a cheste publicazion.

Mandi

Pre Rizieri De Tina

pre Rizieri De Tina

Se tu publichis il document al è just che tu publichis
ancje chest scrit. Grazie!

*Quic jo o soi de stese situazion
e o domandi la stese robe
Grazie*

don Renato Vessio

PRE ANTONI BELINE

PLEVAN DI VISEPENTE
(I) 33031 BASILIAN (FRIÛL)

Pre Rizieri riverît,

o ài vude la to letare, là che tu mi palesavis la tô coritrietât 'e publicazion dal document. O cjapi at di cheste contrietât e vonde. Riguart al fat di publicâlu o no e, piês in mò di zontâ ancje il to scrit, chi propit no sin, nancje cjalant la robe par ledrôs. E o cîr di mutivâmi.

1) Se tu tu j às inprometût al vescul, tu às di stâ a ce che tu j às inprometût. Vadì no tu às di fâlu cognossi. Jo che no mi soi inpegnât no ài chest probleme. O vuei sperâ che no tu ti setis inpegnât ancje par cheâtris firmataris, robe fûr de tô competence.

2) Cuanche un document al è firmât, e adiriture stampât, al è public e cualunche che lu cjape in man al pò doprâlu tal mût ch'al crôt ben. Chest dirit lu à ancje un inprest di informazion. Àstu mai sintût di gjornâi che a publichin documents vûts magari sotvie? Àstu firmât in plene libertât? Cumò acete lis consequencis.

3) In tun gjornâl al decît il consei di redazion e, in ultime istanze, il diretôr "responsabil". Chei âtris a puedin inrabiâsi, odeâ, porconâ, sbregâ dut ma no pratindi di meti la lenghe sun tun sfuei che no àn dirit. Cheste domande di publicâ la tô contrietât tu às di fâle tal unic puest che tu às dirit di dî la tô: te Vite Catoliche. Le âstu fate cuanche Cuargnâl al publicave robis che no erin in linie cu la finalitât e il spirt dal gjornâl, come par esempi la campagne eletoral di chest an? Li e coventave e a ere tal so puest.

4) Mi semee che il câs, al seti ormai masse slargjât e soledut puartât indenant unevore malametri. Tu às vude la pensade di fâ incuintrâ il vescul dome cul grop dal lunis; tu às acetade la rispueste dal vescul dopo che si veve dit di no fevelâ sul documen. Mi pâr che come logjche no tu sês propit a plonp. No rivi a capî cemût che cumò tu vegnis a pratindi coretece cuanche ducj nô o sin stâts plui corez di te e dal vescul. O il dialogo riguardial dome certis categoriis? Tu sês tal grop de pâs. No pensistu che la pâs e puedi cjapâ dentri ancje chêi sot e no dome chêi sore?

Tignîn preât par che Diu nus mantegni tante buine volontât e disponibilitât, ma cence pierdi la tramontane. Par lâ in paradîs nol covente fâ colezion di brutis figuris. Si pò lâ ancje cun tune certe dignitât e logjche.

Par chel ch'al riguarda il publicâ o no, mi conpuartarai daûr cussiense, scoltant conseis ma no acetant inposizions cence fondamente. In chest câs avonde pôc dignitôs, tu ametarâs che la figure plui brute, o sporcje, no le vin fate nô.

Ti ài dit ce che o persavi cun cûr viert e cun lenghe sclete. O sai di jessi trist, ma se tu cumò tu mi cjapis in asse tu sês trist compagn di me e tu pierdis dutis lis induljencis de tô buine volontât di meti insieme realtâts che, salacôr, al è ben ch'a lavorin ognune par so cont. No contrariis, se no si scuene ma nancje masse dongje.

Mandi a ti e a Renato.

Visepente, ai 21 di otubar dal 1988 - Sante Ursule e lis sôs 11.000 compagnis, dutis vergjnis.

pre Antoni Beline, plevan

Bons. RIZIERI DE TINA
Plevan di
33045 N I M I S